



Broj: 04-04-4-3097/23
Sarajevo, 2. 11. 2023. godine

**SAOPĆENJE ZA JAVNOST O OBJAVLJENOM IZVJEŠTAJU REVIZIJE UČINKA
„PRAĆENJE REALIZACIJE PREPORUKA IZ IZVJEŠTAJA 'UPRAVLJANJE
INTERVENCIJAMA U SLUČAJU INCIDENTNOG ZAGAĐENJA JADRANSKOG MORA'“**

Ured za reviziju institucija u Federaciji Bosne i Hercegovine proveo je praćenje realizacije preporuka iz Izvještaja revizije učinka „**Upravljanje intervencijama u slučaju incidentnog zagađenja Jadranskog mora**“. Izvještaj je objavljen 2020. godine kao rezultat učešća u projektu paralelne revizije, u kojem su učestvovala vrhovne revizijske institucije Bosne i Hercegovine, Hrvatske, Crne Gore, Slovenije, Italije i Albanije. Cilj je bio ispitati preduzete aktivnosti na osnovu Izvještaja i procijeniti u kojoj mjeri su realizovane date preporuke.

Praćenjem je obuhvaćen period od novembra 2020. do oktobra 2023. godine. Ispitane su aktivnosti na implementaciji preporuka datih Federalnom ministarstvu poljoprivrede, vodoprivrede i šumarstva, Federalnom ministarstvu okoliša i turizma, Federalnom ministarstvu prometa i komunikacija, Agenciji za vodno područje Jadranskog mora, Ministarstvu poljoprivrede, šumarstva i vodoprivrede Hercegovačko-neretvanskog kantona, Ministarstvu trgovine, turizma i zaštite okoliša Hercegovačko-neretvanskog kantona i Općini Neum.

Rezultati praćenja su pokazali nizak stepen realizacije preporuka, te od devet datih preporuka dvije su u potpunosti provedene, jedna, koja je data većem broju institucija, djelimično je provedena, dok šest nije provedeno.

Slijedom Izvještaja revizije učinka iz 2020. godine, Federalno ministarstvo poljoprivrede, vodoprivrede i šumarstva i Vlada FBiH su nadležnim institucijama BiH uputili Inicijativu za adekvatnije regulatorno i institucionalno uređenje upravljanja i zaštite Jadranskog mora, što je rezultiralo izradom *Plana za nepredviđene slučajeve onečišćenja mora Bosne i Hercegovine*, čije se donošenje očekuje u narednom periodu. Također, izrađen je i *Kantonalni operativni plan mjera u slučaju incidentnog zagađenja voda i obalnog vodnog zemljišta na području Hercegovačko-neretvanskog kantona*, koji je usvojen u toku provođenja predmetnog praćenja.

Procjena rizika za nastanak incidentnog zagađenja voda FBiH, uključujući i vode mora, nije izrađena, tako da se mjere zaštite ne mogu adekvatno planirati. Pravilnik koji propisuje postupke i mjere u slučaju incidentnog zagađenja voda i obalnog vodnog zemljišta i Federalni operativni plan za incidentna zagađenja voda nisu unaprijedjeni zbog čega i dalje nisu uspostavljene odgovarajuće pretpostavke za efikasno djelovanje u slučaju incidentnog zagađenja voda FBiH. Također, nije donesen *Plan odbrane od iznenadnih zagađenja s broda*, niti je izvršena analiza pomorskog saobraćaja radi boljeg uređenja predmetne oblasti.

Iako je problem nedovoljnih kapaciteta za odgovarajuću zaštitu voda prisutan više godina, institucije nisu posvetile dužnu pažnju niti su preduzele dovoljne aktivnosti za njihovo rješavanje.

Uzimajući u obzir značaj Jadranskog mora, kao i ostalih voda koje predstavljaju neprocjenjiv prirodni resurs **Ured za reviziju cijeni da je neophodno dodatno angažovanje nadležnih institucija na osiguranju pretpostavki za njihovu zaštitu i očuvanje.**



GENERALNI REVIZOR
Dževad Nekić